

Date – 19/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap Gen (Rtd) Vijay Kumar Singh a'n Mizoram chu ruihhlo kalkawng lian tak anih tawh avangin ruihhlo do tura mi tin pen chhuah a pawimawh thu a sawi.
2. Health Minister Pi Lalrinpuii'n Mizorama HIV/AIDS dona leh inven kawnga hmalakpui turin Switzerland-a Doctors Without Borders a sawm.
3. Tunhnaia Aizawl leh Silchar inkar kawngpui a chhiat nasat avanga lirthei tangkhang chu chhuah kim vek tawh an ni a, tun dinhmunah lirthei tangkhang a awm tawhlo a ni.
4. Union Finance Minister Nirmala Sitharaman chuan, GST siamthat an tangkaipui ngei em tih chian nan Finance Ministry-in thilsiam 54 man uluk taka a enfiah mek thu a sawi.

<><><>

GOVERNOR

Larsap Gen (Rtd) Vijay Kumar Singh a'n ruihhlo in tualchhungah bu a khuar hneh hle tawh nia a hriat thu sawiin ruihhlo do turin mitin tanrual a pawimawh a ti a, Mizoram chu ruihhloin a hneh theih loh State ti a khawvel hriat leh hmuh theiha pho chhuah tum tura theihtawp chhuah a tul thu a sawi.

Thalaite an fihlim theih nana WATO Trust hmalakna, 'Project Bramhastra' kaltlanga 'Football Exhibition Match - Awareness Campaign Against Narcoterrorism' a hmanpui na ah he thu hi sawiin Larsap chuan WATO Trust hmalakna Project Bramhastra hnuaia sports hmanga ruihhlo dona campaign hrang hrang Mizorama kalpui a ni chu lawmawm a tih thu sawiin, thupui atana khawvel pum hi chhungkhat vek an ni, 'Vasudhaiva Katumbakam' tih hmanga Founder & President Dr. Yogita Karache leh a thawhpuite inpekna fakawm a tih thu a sawi a. Khawvel hmasawn zelah buainate pawh khirh chho zelin thangtharte tana hlauhawm tak ruihhloin min runna pawh a rawn nasa telh telh tih tarlangin, ruihhlo chuan muang changin, thawm dim takin kan taksa, ngaihtuahna leh thlarau nun thlengin a khawih chhe hret hret thin a; chhungkua, khawtlang leh ram pum min runa min ei chhe mek zel a ni, a ti baw.

Larsap chuan ruihhlo dona movement Project Bramhastra pianna leh bultanna Mizoram a ni chu chhinchhiah tlak a tih thu sawiin, ramri kaltlanga ruihhlo tawlhrukna kawng pui an nih avangin ruihhlo hneh turin kan zavaia tanrual a tul thu a sawi a. Project Bramhastra hnuaia ruihhlo dona campaign-a basketball team 104 lai an in ziaklut chu lawmawm tiin, thalaite chu an hun hman nan khawlai nun hnawla, infiamna tualzawl thlang zawk thin turin a chah a. Mi hriathlawh tak tak te'n Project Bramhastra tuipuia an tawiawm chu fakawm a tih thu sawiin, he project hian sports hmanga mi danglam bik - taksa hrisel, rilru hriam leh thlarau nun thlenga mi chak siam a tum a ni, a ti a.

Infihammi, zirlai, milar, nu leh pa leh zirtirtute chu ruihhlo do kawnga tangrual tlat tur leh, Mizoram chu ruihhloin a hneh theih loh State ti a khawvel hriat leh hmuh theiha pho chhuah tum turin a chah a ni.

<><><>

UD&PA MINISTER

UD&PA Minister Pu K. Sapdanga’n nimin khan a bial chhunga State Social Welfare & Rehabilitation Centre tlawhin, enkawl mekte chu beiseina nen huaisen taka khawvel hmachhawn zel turin a chah.

Pu K. Sapdanga chuan a bial chhunga Social Welfare Department hnuaia State Social Welfare & Rehabilitation Centre a tlawh bakah Scout Silver Award lawmna a hmanpui nghal a, Minister chuan, damna mamawh nia inhria te tana damna hmun, thiam neih duha lo pungkhawm, hmabak nei tih inhriaa mahni inpawma Centre a awm te chu mi huaisen an ni a ti a, mi tam tak dawihzep vanga harhfima khawvel hmachhawn ngam lo an awm tam lutuk chu pawl a tih thu sawiin, nitin hmalam pan a, chona thar hmachhawn ngam nun neih thu dam khawchhuah nan a pawimawh a ti a ni.

He Centre hi kum 1990 khan Protective Home tih hming vuahin din a ni a, kum 2020 khan tuna a hming ang hian thlak a ni a, thawktu mi 22 an awm mek a, mi 1,400 chuang enkawl an ni tawh a ni.

<><><>

HEALTH MINISTER

Health Minister Pi Lalrinpuii’n Mizorama HIV/AIDS dona leh inven kawnga hmalakpui turin Switzerland-a Doctors Without Borders a sawm.

Nimin khan Switzerland khawpui Geneva ah Health & Family Welfare Minister Pi Lalrinpuii hian ah Doctors Without Borders (Medecins sans Frontiers) hotu Pi Marie Elosabeth, Humanitarian Representative to the United Nations in Geneva chu a pisa ah lengin Mizoram ah zau zawka thawhho dan tur a sawipui a, Mizorama HIV/AIDS darh zel tur ven kawnga thawhpuih a sawm a ni.

Doctors Without Borders hian Lawngtlai leh Champhai district a raltlante tan health sector hnuaiah project an lo kalpui tawh thin a, tunah hian Zokhawthar ah raltlante tan hriselna kawngah nasa takin hma an la mek a, Minister chuan Mizoram in HIV/ AIDS dona kawngah pawh thawhho puiah sawmin MSACS hmalak mekna tichak tur leh AIDS vei te enkawlna kawngah leh invenna kawnga tanlak puiah a sawm a, Mizoram chu India ramah population chhut a Cancer natna vei tam ber kan nih thu sawiin zirchianna neihsak turin a sawm a ni.

Minister hian WHO Geneva Office-a Consultant Pi Soma kawmin Mizoram chu India ram kilkhawr taka awm a nih thu leh a bikin thingtlanga chengte zingah nu leh naupang hriselna dinhmun ala tha tawh lo hle tih a sawi a, WHO in Mizoram a Health Department tichak tura a hmalak mekna Immunization, nu leh naute hriselna leh khawtlang mipui hriselna ah te WHO in a puih thinna te chu lawmthu sawiin hei aia nasa lehzual zawka Mizoram a rawn thawk turin a sawm bawh.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

DRUGS SEIZED

Central YMA chuan kar hmasa chhung khan Heroin hawng 20 an man a, hemi kaihhnawihah hian mi 50 man an ni bawk.

Central YMA hnuai CADS chuan October ni 11 leh October ni 17 inkar khan No. 4 : Hawng - 20, Tictac bur – 61, damdawi thahnem tak bakah Ruihhlo kaihhnawihah hian mi 50 an man tel a, Counselling mi 32 hnenah pek niin Excise and Narcotics kutah mi 2 hlan an ni a, Home ah mi 21 dah luh an ni bawk.

<><><>

NATIONAL HIGHWAY

Tunhnaia Aizawl leh Silchar inkar kawngpui a chhiat nasat avanga lirthei tangkhang chu chhuah kim vek tawh an ni a, tun dinhmunah lirthei tangkhang a awm tawhlo a ni.

Darkar 24 chhung khan Kawnpui atanga Aizawl pan bungraw hrang hrang phur lirthei 445 chhuah a ni a, Lirthei ruak, Sairang peng leh Mualkhang/Khamrang inkara tangkhang Assam lam pan tur lirthei 454 chhuah a ni bawk a, heti hian avaiin Aizawl leh Silchar inkarah kawng chhiat avanga lirthei tangkhang darkar 24 liamtaa chhuah chu 899 a ni.

Thu dawn danin Sairang leh Kawnpui inkar kawng siam that hi a chhiat leh nasat tawh em avangin kawng a nal em em a, truck ruak a kal hlei thei lova, thu leh tang an tam thin avangin lirthei neituten naasa takin sawrkar an nawr a, Kawnpui atanga Khamrang inkar kawng thawmthat hnathawh anih theih nan sawrkar chuan theihtawp chhuahin NHIDCL lamin thawm that hna an thawk a, PWD in Boulder an ngaihtuah thung a ni.

Hetihlai hian sawrkar chuan Mamit District lamah pawh PWD (Highway) hmalakna in kawngpui siamthat hna a thawk tan a, Mamit panna kawngpui chhia avang hian All NGO hruaitute leh Commercial Vehicle Owners Association hruaituten Mamit khawpui panna kawngpui hrang hrang NH 108 leh NH 06 chu October ni 16 atang khan anlo dang tawh a, amaherawhchu PWD hotute nen an inbiak hnuah karleh Nilai (October ni 22) thleng tihtawp lailawk an remti a ni.

<><><>

MIZO DIASPORA CELL

Mizo Diaspora Cell, Chief Minister Office chuan an thu dawn bawhzuiin Singapore-a hnathawka awm Mizote pawisa tihchingpensak thu hlaa hma la turin CID Special Branch te a hriattir a, CID hian thudawn bawhzuiin hmeichhe pakhat Guwahati atanga Lengpui Airport-a rawn tum chu ni October ni 13 khan manin, thu zawhfiah atan hren zui a ni.

Thuchhuah tarlan danin he hmeichhia hi Singapore-a hnathawk mek Mizo thahnem takten an pawisa Mizorama an chungte thawnsak tura an rawih, an sum leh paite tihchingpensak zui leh ta si nia puh a ni. Hnathawktu tam zawkte hian dan ang taka ram danga pawisa thawnchhuah dan an hre bel lo va. He hmeichhia hian thawn man tlawm zawka thawnsak thei anga a insawi bakah intiamkamna thlenga a neih ngam avangin mi tam takin a kutah an pawisa an dah ta a. An sum dah belhkhawm hi cheng nuaih za thum (300 lakh) vel nia hriat a ni.

Thudawn danin October ni 14 khan a tuartute hian, Mizo Diaspora Cell kaihhruaiin, Aizawl Police Station-ah FIR an thehlut a. He case hian thubuai ril zawk, ram chhunga dan phal loh a pawisa thleng kualna emaw ramri kana dan phal loh bungraw lakluh leh chet velna thlenga nghawng a neih leh neih loh chhui nghal a ni.

Mizo Diaspora Cell chuan ram pawna hnathawka chhuakten an chungte pawisa an thawnna lama fimkhur a tulzia a tih lan thu an sawi a. Dan ang taka thawn ngei chu a him ber thu leh dan lo va thawn theihnate chu tlawm zawk leh remchang zawk angin lang mah se a him lo a ni tih a tifah an ti a, sorkar chuan dan ang taka pawisa thawnnaah chauh an thawhchhuah pawisate chu thawn zel se tiin a chah a ni.

<><><>

GST Bachat Utsav

Union Finance Minister Nirmala Sitharaman chuan, GST siamthat an tangkaipui ngei em tih chian nan Finance Ministry-in product 54 man uluk taka a enfiah mek thu a sawi.

Nimin khan New Delhi-a GST Bachat Utsav chungchanga joint press conference neihah thu a sawi a, Next-Gen GST hamthatna chu heng thil 54-ah a kimin a pass vek tawh a ti. Finance Minister chuan, heng GST siamthatnate hi kalpui a nih chu mipuite tana hamthatna nasa zawk thlen theihna tura Central Sorkar leh GST Council te thawhhona a lantir a ni, a ti. Rate tihhniam te, kalphung awlsam zawka siam te, slab pali atanga pahnih-a tihhniam te, classification nena inzawm thil chinfel te chu tihfel vek a ni tawh tih a sawi bawk. GST 2.0 siamthatna hian ram economy a tichak hle tih a sawi a, festival season chung hian sector pawimawh tak tak, electronics, automobiles, leh consumer goods an inhralh tha tih a sawi bawk.

<><><>